

經

考

內則稱五帝有史官。既有史官，必應記事。但未必名為春秋耳。

黃澤曰：二百四十二年者，夫子之春秋。自伯禽至魯滅史官所書者，魯春秋也。王者賞功罰罪，雖或不當，然猶是號令足以及天下。名分未至大壞，夏商皆然。惟東周自平王微弱，不復能制馭諸侯，而後上下之分陵替，禮義幾於漸盡。故孔子作春秋，平王以前，不復論者，以其時天子能統諸侯故也。始於平王者，所以救周室之衰微而扶植綱常也。

顧炎武曰：春秋不始於隱公。晉韓宣子聘魯，觀書於

太史氏見易象與魯春秋曰周禮盡在魯矣吾乃今知周公之德與周之所以王也。左傳昭公二年蓋必起自伯禽之封以洎於中世當周之盛朝覲會同征伐之事皆在焉故曰周禮而成之者古之良史也。孟子雖言詩亡然後來春秋作然不應伯禽至孝公自隱公以下世道衰微史失三百五十年全無記載其官於是孔子懼而修之自惠公以上之文無所改焉所謂述而不作者也自隱公以下則孔子以己意修之所謂作春秋也然則自惠公以上之春秋固夫子所善而從之者也惜乎其書之不存也

據魯史

黃澤曰。杜氏云。凡策書皆有君命。謂如諸國之事。應書於策。須先稟命於君。然後書。如此則應登策書。事體甚重。又書則皆在大廟。如孟獻子書防于廟。亦其例也。孔子非史官。何由得見國史策文。與其簡牘本末。考見得失。而加之筆削。如此則若無君命。安可脩改。史官若不稟之君命。安敢以國史示人。據夫子正樂。須與太師。褒之屬。討論詳悉。然後可為。不然則所正之樂。如師摯之始。開雎之亂。洋洋乎盈耳。時君時相。謂之全不聞知可乎。又哀公使儒學士喪禮於孔子。士喪禮於是乎書。則其餘可知也。蓋當時魯君雖不能用。

載

孔子至於託聖人以正禮樂。正書法。則決然有之。又曰。策書是重事。史官不以示人。則他人無由得見。如今國史自非常為史官者。則亦莫能見而知其詳。又夫子未歸魯以前。未有修春秋之意。自歸魯以後。知其已老。道之不行。始志於此。其作此經。蓋不過時歲間耳。自非脩見國史。其成何以如是之速哉。切謂夫子聖德已孚於人。魯之春秋。雖史官亦知其舛謬。非聖人莫能刊正。是以適授其機。而夫子得以筆削也。觀夫子與魯樂官論樂。則知樂之所以正。亦樂官有以推贊之。又或出於時君之意。亦未可知也。

又曰哀公十四年西狩獲麟孔子始修春秋明年子路卒又明年孔子卒則是此書成得年歲間而孔子沒也當時門弟子見者必少蓋此書亦難以泛然示人想夫子沒後弟子方見之

史法書法

杜預曰汲郡汲縣有發其界內舊冢者大得古書皆簡編科斗文字始者藏在祕府余晚得見之所記大凡七十五卷多雜碎怪妄不可訓知周易及紀年最為分了其紀年篇自夏殷周皆三代王事無諸國別惟特記晉國起自瑤叔次文侯昭侯以至曲沃莊伯莊伯之十

一年十一月魯隱公之元年正月也。皆用夏正建寅之月。
為首。^歲編年相次。晉國滅獨記魏事。下至魏哀王之二十
年。蓋魏國之史記也。哀王二十三年乃卒。故特不稱諡。
謂之今王。其著書文意大似春秋經。推此足見古者
國史策書之常也。又稱魯隱公及邾莊公盟于姑蔑。
即春秋所書邾儀父未王命故不書爵。曰儀父。貴之也。又
稱晉獻公會虞師伐虢。滅下陽。即春秋所書虞師晉
師滅下陽。先書虞。賄故也。又稱周襄王會諸侯于河陽。
即春秋所書天下。^王狩于河陽。以臣召君。不可以訓也。諸若
此輩甚多。略舉數條。以明國史皆承告據寔而書。時

事仲尼修春秋以義而制異文也。

書時事之變

程子曰他經非不可以窮理也。但論其義耳。春秋因其行事是非較著故窮理為要。春秋以何為準。無如中庸欲知中庸無如權。何物為權。義也。時也。春秋已前既已立例。到近後來書得全別。一般事便書得別。有意思。若依前例觀之。殊失也。春秋大率所書事同則辭同。後人因謂之例。然有事同辭異者。蓋各有義。非可例拘也。

朱子曰。蘧子由解春秋。謂其從赴告。此說亦是。定哀

之時聖人親見據實而書。隱桓之世時既遠史冊亦有簡略處。夫子但據史冊寫出耳。

呂大圭曰。或曰。春秋所書皆據魯史。爾所謂門人高弟不能贊一辭者。其義安在。曰。有春秋之達例。有聖人之特筆。故曰其事則齊桓晉文。其文則史。其義則邱竊取之矣。有特筆以明其是非者。聖人之精義。黃澤曰。春秋所以難者。乃是失却不修春秋。若有不修春秋。互相比證。則史官記載。仲尼所以筆削者。亦自顯然易見。

又曰。學者須以考事為先。考事不精。而欲說春秋。則失。

之疏矣。夫考事已精，而經旨未得，尚多有之。未有考
事不精，而能得經旨者也。又須先曉史法，然後可求
書法。

又曰：春秋固是經，然本是記事，且先從史看。考索事情，
推校書法，事情既得，書法既明，然後可以辨其何以
謂之經。何以謂之史？經史之辨既決，則春秋始可通。
又曰：春秋書法，須先攷完前後異同，詳畧，以見聖人筆
削之旨。事同而書法異，書法同而事異，正是聖人特
筆處。大抵先於夫子未修春秋前觀之，然後沿流而
下，綱舉目隨，無不脗合。若只從隱公以後求之，宜乎

多所不通也。

又曰魯史春秋有例。夫子春秋無例。非無例。以義為例。隱而不彰也。惟其隱而不彰。所以三傳各自為說。若左氏所說。止是史官所守之法。

又曰史者事也。經者理也。先儒於春秋亦多所益。而莫能提其要歸。其於史官記載之體。聖人筆削之法。蓋未有兼得之者。是以或得之於經。則失之於史。得之於史。則失之於經也。

又曰春秋以前禮法未廢。史所書者。不過君即位。君薨葬。逆夫人。夫人薨葬。^大夫卒有年。無年。天時之變。

郊廟之禮諸侯卒葬交聘會朝大抵不過如此耳。無
有伐國滅國圍城入其國某邑等事也。其後禮法既
壞史法始淆亂如隱公元年除書及邾宗盟公子益
師卒外其餘皆失禮之事。如不書即位是先君失禮
為魯亂之本。鄭伯克段是兄不兄弟不弟天王歸仲
子之賵則失禮顯然。祭伯來則不稱使舉一年如此
則二百四十二年可知如此則夫子春秋安得不作
又曰赴告策書諸所記注多違舊章此杜氏說大抵
春秋時史法頗難為史官者亦只當直書中間違禮
得禮皆有之亦是時使之然記事者只得如是不可

律以夫子書法見夫子簡嚴便謂史法非是也夫子之春秋不可以史法觀後世作史者只當用史法不可模擬聖人也胸中權度不如聖人則予奪不得其正矣故作史惟當直書為得體夫子春秋只是借二百四十二年行事以示大經大法於天下故不可以史法觀之惠公以前春秋其不合於典禮者尚少故夫子截自惠公以後者所以撥亂也

又曰春秋書法自書契以來所無舊史固是周公之道法然常法也王政不綱而後怪證百出弑父與君無所不有而紀綱法度俱已蕩然分限既踰無一合於古者

而史法始難乎紀載矣。若非聖人刪修之，則二百四十二年之行事，是非得失，淆亂穢雜，而無所折衷矣。天下後世，安所取正哉？又曰：春秋皆是處變，常者易處，而變者難處，故春秋非聖人不能作。

理明義精之學

程子曰：春秋一句即一事，是非便見於此，乃窮理之要。學者只觀春秋，亦可以盡道矣。張子曰：春秋之書，在古無有，乃仲尼所自作，惟孟子為能知之，非理明義精，殆未可學。先儒未及此而治。

之故其說多鑿

門人問讀春秋之法朱子曰只是攬經所書之事迹而準折以先王之道某是某非某人是底猶有未是處不是底又有彼善於此處自將道理折衷便是只是聖人言語細密要人子細斟量考索耳

朱子曰春秋皆亂世之事聖人一切裁之以天理

又曰四代之禮樂此是經世之大法也春秋之書亦經世之大法也然四代之禮樂是以善者為法春秋是以不善者為戒

黃澤曰春秋本是一貫之道夫子以一理而裁萬事

洪纖高下各有攸當而學春秋者竟未知其為一貫也

舊史闕文傳經者脫漏

王觀國曰孔子曰君子於其所不知蓋闕如也故春秋書正月甲戌己丑陳侯鮑卒左氏傳曰再赴也蓋惟孔子不知陳侯卒在何日因其再赴故書甲戌己丑二日從魯史之文也又成公十四年夏五鄭伯使其弟語來盟左氏傳曰夏鄭子人來尋盟蓋夏五無月日也闕文也左氏亦止言夏而不言月日則是左氏作傳時經已闕月日矣莊公二十四年冬書郭公而左氏無傳蓋亦經之闕文也左邱明與孔子同時

又爲魯太史。魯史記盡在太史。則左氏於傳豈不能補正之。而於傳亦闕而弗補者。以此知作經已久。經之文已闕而不可知。然後傳始作也。前漢藝文志曰。仲尼以魯周公之國。禮文備物。史官有法。故與左邱明觀其史記。據行事。仍人道。因興以立功。就敗以成物。假日月以定歷數。藉朝聘以正禮樂。有所褒譏貶損。不可書見。口授弟子。弟子退而異言。邱明恐弟子各安其意。故論本事而作傳。審如是。則邱明親受孔子之旨也。然以闕文校之。則漢志之言。復窒而不通。蓋班固之言。未可深信耳。王應麟曰。西疇崔氏曰。春秋桓四年七年無秋冬。定十

四年無冬。桓十七年書夏五而闕其月。在二十二年書夏五月而闕其事。僖二十八年書壬申而不繫之月。桓十年書五月而不繫之夏。昭十二年書十二月而不繫之冬。郭公仲孫忌與凡日食而不繫朔與日者皆闕也。

顧炎武曰：隱十年無正者，以無其月之事而不書。非有意削之也。穀梁以爲隱不自正者，繫矣。趙氏曰：宣成以前人名及甲子多不具，舊史闕也，得之矣。

又曰：許男新臣卒，左氏傳曰：許穆公卒於師，葬之以侯禮也。而經不言於師，此舊史之闕。夫子不敢增也。穀梁子不得其說，而以爲內桓書師，劉原父以爲去。

其師而歸卒於其國。鑿矣。

又曰：孔子曰：吾猶及史之闕文也。史之闕文，聖人不敢

益也。春秋桓公十七年冬十月朔日有食之，傳曰：不書

日，官失之也。僖公十五年夏五月日有食之，傳曰：不書

朔與日，官失之也。左氏之書，成之者非一人，錄之者非

一世，可謂富矣。而夫子當時未必見也。史之所不書，則

雖聖人有所不知焉者。成公十三年公會諸侯，代秦下正義曰：經文依史官策書，策書

所無，故經文遂闕也。傳文來于前時，前時先有故傳文獨存也。若乃政葬惠公之類，不

書者，舊史之所無也。曹大夫宗大夫司馬司城之不名

者，闕文也。

齊崔氏出奔衛，去名而書族，宗殺其鄭伯，僖大夫山去族而書字，疑皆前史之闕。鄭伯，僖

頑楚子麋齊侯陽生之實弒而書卒者傳聞不勝簡
書是以從舊史之文也。然卻氏曰赴以卒則卒赴以弒
聞云爾也。傳聞不勝簡書是以左氏出於獲麟之後
書卒以待察也。此之疑獄。網羅浩博。寔夫子之所未見。子不云乎。多聞闕疑。慎
言其餘。修春秋之法。亦不過此。春秋因魯史而脩者
也。左氏傳采列國之史而作者也。故所書晉事自文
公主夏盟。政交於中國。則以列國之史參之。而一從
周正。自惠公以前。則間用夏正。其不出於一人明矣。
又曰桓公四年七年。闕秋冬二時。定公十四年。闕冬
一時。公羊成公十昭公十年十二月無冬。僖公二十八年

年。闕冬十月。

冬無月而有壬申丁丑。桓公十四年有夏五而無月。
桓公十七年冬十月有朔而無甲子。桓公三年至九
年十一年至十七年無王。桓公五年春正月甲戌己
丑陳侯鮑卒。甲戌有日而無事。皆春秋之闕文。後人
之脫漏也。莊公二十二年夏五月無事而穀梁有桓
不書首月杜氏釋例以為闕誤無王之說竊以為夫子於繼隱之後而書公即位則
桓之志見矣。奚待去其王以為貶耶。

又曰王使榮叔來錫桓公命。不書天。闕文也。文公五年
王使榮叔

歸舍且若曰以其錫桓而貶之則桓之立春秋固已公
昭同之矣。商臣而書楚子。文公九年商人而書齊侯。文公十五年皆

之辭無所可貶。孰有貶及於天王耶。

又曰。僖公元年。夫人氏之喪。至自齊。不言姜。宣公元年。遂以夫人婦姜至自齊。不言氏。此與文公十四年。叔彭生不言仲。定公六年。仲孫忌不言何同。皆闕文也。聖人之經。平易正大。

又曰。邵國賢寶曰。夏五。魯史之闕文。與春秋之闕文。與。如謂魯史之闕文也。筆則筆。削則削。何獨闕其所不必疑。以示後世乎。闕其所不必疑。以示後世。推不誠伯高之心。是不誠於後世也。聖人豈為之哉。不然。則甲戌己丑。叔彭生仲孫忌。又何為者是。故夏五春。

秋之闕文也。非魯史之闕文也。

又曰：范介儒守曰：紀子伯郭公夏五之類。傳經者之脫文耳。謂為夫子之闕疑。吾不信已。按甲戌己丑似左傳已有再赴之說

立言之體

顧炎武曰：凡書殺其大夫者。義繫於君。而責其專殺也。盜殺鄭公子駢。公子發。公孫輒。文不可曰盜殺大夫。故不言大夫。杜氏曰：以盜為文。其義不繫於君。猶故不得言其大夫。之盟會之卿書名而已。胡氏以為罪之而削其大夫。非也。

又曰、閹弑吳子餘祭、言吳子則君可知矣、文不可曰
吳閹弑其君也、盜殺蔡侯申同、此春秋中凡若穀梁
此者皆趙子所謂避不成辭
子曰、不稱其君、閹不得君其君也、非也、

稱元

王應麟曰、胡文定春秋傳曰、元即仁也、仁人心也、龜
山謂其說似大支離、恐改元初無此意、東萊集解
亦不取

顧炎武曰、五代史漢本紀論曰、人君即位稱元年、常
事爾、孔子未修春秋、其前固已如此、雖暴君昏主、妄
庸之史、其記事先後遠近、莫不以歲月一二數之、乃
理之自然也、元吳萊本此
作改元論其謂一為元、蓋古人之語爾、

及後世曲學之士始謂孔子書元年為春秋大法遂以改元為重事徐無黨注曰古謂歲之一月亦不云一月而曰正月國語言六呂曰元間大呂周易列六爻曰初九大抵古人言數多不言一不獨謂年為元也呂伯恭春秋講義曰命日以元虞典也書月正命元書日祀以元商訓也惟元祀十有年紀日辰之首其謂之元蓋已久矣豈孔子作春秋而始名之哉說春秋者乃言春秋謂一為元殆欲深求經旨而反淺之也

周正朔

後漢書陳寵傳冬至之節陽氣始萌故十一月有蘭

射干芸荔之應。天以為正。周以為春。十二月陽氣上通。雉雉雞乳。地以為正。殷以為春。十三月陽氣已至。天地已交。萬物皆出。蟄蟲始振。人以為正。夏以為春。何休曰。夏以斗建寅之月為正。平旦為朔。法物見色尚黑。殷以斗建丑之月為正。雞鳴為朔。法物牙色尚白。周以斗建子之月為正。夜半為朔。法物萌色尚赤。朱子曰。春秋是魯史。合作時王之月。

又曰。夫子周之臣子。不改周正朔。

王應麟曰。春王正月。程氏傳曰。周正月非春也。假天時以立義耳。胡氏傳曰。以夏時冠月。垂法後世。以周

正紀事示無其位。不敢自專。沙隨程氏曰。周正之春。包于丑寅月。呂成公講義於春字略焉。蓋闕疑之意。黃震曰。文定說春秋以春為夏正之春。建寅而非建子可也。以月為周之月。則時與月異。又存疑而未決也。故晦菴先生以為若如胡氏學。則月與時事常差兩月。恐聖人作經。不若是之紛紛更也。

黃澤曰。春秋王正月。三傳及三家之法。同是周正建子之月。別無異辭。惟近代二百年間。始有夏時之說。胡文定公云。以夏時冠周月。蔡九峰云。商周不改月。蔡西山說亦同。尹和靖解行夏之時。秉殷之輅。服周之冕。云其

大綱見於此。而條目見於春秋。於是三傳愈不可信。而夏正之說起矣。晦菴先生曰。某親見文定家說文定春秋說。夫子以夏時冠周月。以周正紀事。謂如公即位。依舊是十一月。只是孔子改正作春正月。某便不敢信。恁地時二百四十二年。夫子只證得箇行夏之時。四箇字。據今周禮有正月。有正歲。則周寔是元改作春正月。夫子所謂行夏之時。只是為他不順。欲改正建寅。如孟子說七八月之間旱。這斷然是五六月。十一月徒杠成。十二月興梁成。分明是九月十月。晦菴之說。明白如此。而不能救學者之惑。可勝歎。

哉

又曰春王正月此不通周之時周之正月而據文定則春字是夫子特筆故曰以夏時冠周月又謂夫子有聖德無其位而改正朔如此則正月亦是夫子所改蔡元峰則謂周末嘗改月引史記冬十月為證如此則時或是夫子所移易以此說夫子豈不誤哉荅顧子行夏之時乃是為萬世通行之法非遂以之作春秋也凡王者正朔所以統一諸侯若民事自依夏時後來漢武帝魏文帝始定用夏時是行夫子之言也今只就經文舉所書月以證改時改月莊公二十有三年夏公如齊觀社

此周之四月也。當夏正建卯之月。僖公三年。自去冬十月不雨。至春書王正月不雨。夏四月不雨。至六月雨。若用夏正。則六月乃建未之月。歷三時不雨。六月乃雨。如此。則春不得耕。夏不得種。不入土。為災大矣。今此六月。是周正建巳之月。得雨。可以耕種。則於農事無妨。故此年不書旱。不書飢。哀公十四年春。西狩獲麟。冬獵曰狩。此是子丑之月。故書狩也。而主夏正者。則謂非是。而狩。所以為譏。澤以為既。不書公狩。又不書狩之地。此只是虞人修常職。本不應書。所以書者。蓋特為獲麟故。不可彊以為貶。漢初猶有夏殷周及魯歷。又有顓頊歷。古

人見前代歷紀甚明。又三傳所載之事，互有異同。然同是遵用周正朔，無異說。凡三代正朔，皆自是為一代之制。既改月，則須改時。若周之改月，只以孟子歲十一月徒杠成，十二月與梁成，及七八月之間旱為證。晦菴集注所據周改時止以行夏之時為據，蓋周以建子之月為春，終是不正，故夫子思行夏之時也。

又曰：莊七年秋大水，無麥苗。杜氏曰：今五月周之秋平地出水，漂殺熟麥，及五稼之苗。傳云：無麥苗，不害嘉穀也。杜氏謂黍稷尚可更種，故曰不害嘉穀。澤謂苗者五稼在田之通稱。孟子云：宋人閔其苗之不長。又曰：惡莠。

恐其亂苗。漢書立苗欲疎。唐史稱青苗皆謂此也。今此書無麥苗記異耳。一穀不登不書。而或書無麥者。以舊穀既沒。新穀未登。此時麥為民食之最重。故特書也。今此是斗建午之月。當是水與雨會。故麥熟未得斂。而四月已種之穀成苗。亦為水所漂。又是年本不熟麥。而又與水會。併穀苗皆無。春秋二百四十二年。惟此年一見。所以為異。此年不書飢者。蓋水亦旋退。更種他穀之故。今之世。謂春秋用夏正者。則以麥苗為一物。謂秋水漂穀麥之苗也。澤謂若以為夏正。則種麥成苗在先。水至在後。當是九月之水。九月而

始大水古今罕有之事一不通也。經書無麥苗又書大無麥禾皆是據收成之後計有無而書。若以為九月無麥之苗則所繫未重。經決不書。二不通也。設今是五六月水至八九月未退不曾種麥故書無麥苗亦已可疑。况書秋大水若以為建成之月則水之害亦止於秋至冬十月則水已退二麥尚可種豈得遽云無麥苗乎。三不通也。

又曰何休最好異論如黜周王魯之類甚多今其釋公羊傳亦止用周正如冬十一月有星索于東方何氏云周十一月夏九月日在房心是也。惟西狩獲麟解

云河陽冬言狩獲麟春言狩者蓋據魯變周之春以
為冬去周之正而行夏之時詳其說亦只謂孔子書
狩於春者以周之正月二月是建子丑之月於夏時
為冬故書狩夫以書春而書狩此何氏所以謂之去
周正而行夏時蓋緣此年不書王正月而止書春故
何氏有此論然以前二百四十一年皆據周正以解公羊
矣獨此年有此論亦所謂立異論之一者又按何氏
云絕筆於春不書下三時者起木絕火王制作道條
當授漢也觀何氏此說怪誕穿鑿則無怪其於春秋
之終而謂孔子改周正也

又曰近世士大夫多聞先儒用周正之說以為時不可改甚者至以為月亦不可改如七八月之間旱與十一月徒杠成十二月與梁成趙岐釋以周正晦菴亦從趙岐而近世說者以趙岐為非則是併晦菴皆非之矣此是本無所見而妄生事端以疑惑聖經又見一說以為正月者是魯之正月魯諸侯也諸侯正朔稟於天子安得有正月彼蓋嫌杜氏王周正月以為周不曾改月焉得有王政故讀王字歇句而以正月為魯侯即位之首月其說妄誕不可解矣審如此何不去却王字以見明白乎據其說添一王字是為

尊王而不與上下文相屬不成文理矣。

陳樸曰、月數與周而改、春隨正而易、證以春秋左傳、孟子後漢書陳寵傳、極為明著、成十年六月丙午、晉侯使甸人獻麥、六月乃夏四月也、僖五年十二月丙子朔、晉滅虢、先是卜偃言克虢之期、其九月十月之交乎、丙子朔必是時也、偃以夏正言、而春秋以周正書、可見十二月丙子為夏十月也、僖五年春王正月辛亥朔日南至、王正月冬至、豈非夏十一月乎、經有只書時者、僖十年冬大雨雪、蓋以酉戌為冬也、使夏時之冬而大雪、何足以為異而記之、襄二十八年春

無冰。蓋以子丑月為春也。使夏時之春而無冰。何足
以為異而記之。春蒐夏苗。秋獮冬狩。四時田獵定名
也。桓四年春王月。公狩于郎。杜氏注曰。冬獵曰狩。
周之春夏之冬也。魯雖按夏時之冬。而於子月行冬
田之狩。夫子即書曰。春狩于郎。此所謂春非周之春
而何。哀十四年春。西狩獲麟亦然。定十三年夏大蒐于
比蒲。魯雖按夏時之春。於卯辰之月。行春田之蒐。夫
子只書曰。夏蒐于比蒲。此所謂夏非周之夏而何。以
次年又書五月蒐于比蒲。亦然也。陳寵傳尤明白。曰。
天以為正。周以為春。注曰。今十一月也。地以為正。殷

以為春注云今十二月也。人以為正夏以為春注云
今正月也。孟子七八月之間旱等。不待多言而明是
三代之正。子丑寅三陽月。皆可以春言也。胡氏春秋
傳不敢謂王正月為非子月。而於春王正月之春字
謂以夏時冠周月。皆考之不審。安有隔兩月以夏時
冠周月之理。

熊朋來曰。陽生于子。即為春。陰生于午。即為秋。此之
謂天統。

又曰。若依夏時周月之說。則正月二月須書冬。而三
月乃可書春耳。

顧炎武曰。漢書高帝紀春正月注。師古曰。凡此身月號
皆太初正歷之後。記事者追改之。非當時本稱也。以十
月為歲首。即謂十月為正月。今此真正月。當時謂之四
月耳。他皆類此。叔孫通傳。諸侯群臣朝十月。師古曰。漢
時尚以十月為正月。故行朝歲之禮。史家追書十月。
又曰。漢元年冬十月。五星聚東井。當是建申之月。劉
敞曰。按曆太白辰星去日。率不過一兩次。今十月而
從歲星於東井。無是理也。然則五星以秦之十月聚
東井耳。秦之十月。今七月。日當在鶉尾。故太白辰星
得從歲星也。按此足明記事之文。皆是追改。惟此一

事失於追改遂以秦之十月為漢之十月耳夫以七月誤為十月正足以為秦人改月之證

又曰春秋僖公五年晉侯殺其世子申生經書春而傳在上年之十二月十年里克弑其君卓經書正月而傳在上年之十一月十一年晉殺其大夫平平鄭父經書春而傳在上年之冬十五年晉侯及秦伯戰于韓獲晉侯經書十有一月壬戌而傳則為九月壬戌經傳之文或從夏正或從周正所以錯互如此以羅必經傳據晉史與史記漢元年冬十月五星聚東井乃秋七月之誤正同僖公五年十二月丙子朔號公醜奔

京師而卜偃對獻公以為九月十月之交。襄公三十年。絳縣老人言臣生之歲正月甲子朔以長曆推之。為魯文公十一年三月甲子朔。此又晉人用夏正之見於傳者也。

又曰。隱公六年冬。宋人取長葛。傳作秋。劉原父曰。左氏月日與經不同者。邱明作書。雜取當時諸侯史策之文。其用三正參差不一。往而迷。故杜所云冬。傳謂之秋也。改宋用殷正。則建酉之月。周以為冬。宋以為秋矣。

又曰。桓公七年夏。穀伯綏來朝。鄧侯吾離來朝。傳作

春劉原父曰傳所据者以夏正紀時也

又曰文公十六年齊公子商人弑其君舍經在九月傳作七月隱公三年夏四月鄭祭足帥師取溫之麥秋又取成周之禾若以爲周正則麥禾皆未熟四年秋諸侯之師敗鄭徒兵取其禾而還亦在九月之上是夏正六月禾亦未熟注云取者蓋交踐之終是可疑按傳中雜取二正多有錯誤左氏雖發其例於隱之元年曰春王周正月而間有失于改定者文多事繁固著書之君子所不能免也

又曰春秋時月並書于古未之見攷之尚書如金縢

秋大熟未獲言時則不言月。伊訓惟元祀十有二月
乙丑。武成惟一月壬辰。康誥惟三月哉生魄。召誥三
月惟丙午。臚多士惟三月。多方惟五月。丁亥。顧命惟
四月哉生魄。畢命惟十有二年六月庚午。臚言月則
不言時。朱文公答林擇之亦有其他鍾鼎古文皆如
古文例不書時之說。

此春秋獨並舉時月者。以其為編年之史。有時有月。

有日。多是義例所存。不容於闕一也。或疑夫子特筆
是不然。舊史既

以春秋為名。自當書時。且如隱公二年春。公會戎于
潛。不容二年。書春元年。乃不書春。是知謂以時冠月。

出于夫子
者非也。

按夏時周月。其說甚異。寔由於程子假天時以立義。

一語。尹氏胡氏蔡氏緣之。而議論滋紛矣。程子曰。周正月非春也。夫謂周正月非夏時之春。則可。謂周正月。周不謂之春。則不可。吾友吳行先告余曰。程子及胡氏之意。周雖改正朔。而周正月之非春。雖周亦只謂之冬。不謂之春。月為王之正朔。可改春為天時。一定不可。改孔子作春秋。乃于王正月上書春。明正月當應天時之春。不當如周之以天時之冬為正月也。書春於王正月之上。而周正之失自明。故曰假天時以立義。而胡氏又曰。以夏時冠月。以周正紀事也。諸儒所以辨之者。俱未推得其本意。且諸儒辨論。乃易明者。既天時與正

朔差兩月。舉二百四十年。時月盡紛更如此。程子及胡氏豈昧者哉。夫亦曰。天時有一定。百王所同。萬世共曉。今移而加於玉月之上。玉為周王。則月固知為周月。而天下後世明知其月之非春。然後可以悟正月之不可不自春始。苟曰。冬正月。則稗不順。而當行夏時。用建寅為正月。明矣。又考其致誤之由。蓋於殷周改月。既未得其詳。疑或改或不改。故引伊訓以見月之不改。引史記以見時亦不改。惟春秋紀事。月固改矣。周改時。無明文。遂斷然以時為一定不改者也。程子及胡氏既疑於經文。而又得行夏之時一語。遂傳會其說。以書春於王。

正月上為聖人之微辭也。不然先賢豈好為多事而
強加聖人以改周正朔哉。若周改時有明文可舉必
無是說矣。余曰周頌臣工篇嗟嗟保介維春之莫以
孟春耕藉載耒耜措之參保介之御間言也。勅保介
者天子諸侯耕藉勸農保介乃同車之人田器置於
其間故嗟之以命諸侯勸農為急。下文云抑又何求
乎。惟民之如何用力於新田畝田者是急耳。麥則將
受上帝明賜矣。盡力於耕上帝又將畀以豐年也。命
農具錢鏹耕治正三之日于耜四之日舉趾事也。奄
觀鉅艾言穫之不遠以勉耕之當急也。寔孟春而曰

雖春之莫鄭康成詩箋曰周之季春於夏為孟春諸
侯朝周之春故晚春遣之所謂朝周之春者周雖改
時而諸侯朝以夏之孟月夏之孟春於周則晚春也
孔冲遠正義言朝祭之期甚明又孟子秋陽以暴之
趙岐注曰周之秋夏之五六月盛陽也禮記明堂位
孟春乘大路鄭康成注也曰孟春建子之月魯之始郊
日以至孔冲遠正義曰雜記孟獻子曰正月日至可
以有事於上帝郊特牲云周之始郊日以至明堂位又
言季夏六月以禘禮祀周公於大廟鄭注曰季夏建
巳之月也孔冲遠正義曰若夏之季夏非祭之月

其於詩正義則曰、雜記云、七月而禘、獻子為之、以
六月為正、略舉數事、亦足證周不惟改月、寔改時
矣。胡氏引史記冬十月、顧氏既辨之詳、而其所引
伊訓攷之漢律歷志、明引此為朔旦冬至、冬至於
夏為十一月、於商為十二月、於周為正月、此改月
之證、非不改月之證、左傳昭公十七年、梓慎曰、火
出於夏為三月、於商為四月、於周為五月、以周人言、
商周改月、如梓慎、以漢人言、商周改時、如陳寵、皆明
據也、後儒去古詠遠、古歷不可得見、又未能坐知千
歲、日至、徒以空言說經、往、失之、凡立言者、慎之又

慎○有○疑○則○闕○毋○鑿○說○毋○改○經○其○斯○為○今○日○讀○書○之○法○
律○與○

書王

黃澤曰說秋春、當先識大意謂於二百四十二年行事之外求之若不於大意而於逐事推尋則舛謬必不少矣只如元年春王正月公羊傳云王者曷謂文王也此已失之拘滯若復推究其極則文王雖為周家始受命之君然居殷之世乃殷之諸侯耳文王自承殷正朔曷嘗自以建子為正乎今直以王正月為文王是改殷正朔自文王時已如此其為教義之

害非小矣。故春秋易致乖錯。杜元凱却云魯隱之始年周王之正月。此言平正無疵。杜氏於大意固亦未甚明。然較之他人則有間也。

顧炎武曰。未為天子則雖建子而不敢謂之正。武成惟一月壬辰是也。已為天子則謂之正而復加王以別於夏正。殷春秋王正月是也。

又曰。廣川書跋載晉姜鼎銘曰。惟王十月乙亥。集古錄傳古圖載此。而論之曰。聖人作春秋於歲首則書王。並作王九月而論之曰。聖人作春秋於歲首則書王。說者謂謹始以正端。今晉人作鼎而曰王十月是。當時諸侯皆以尊王正為法。不獨魯也。李孟陽曰。今人

往、有得秦權者、亦有王正月字、以是觀之、春秋王
正月、必魯史本文也、言王者、所以別於夏殷、並無他
義、劉原父以王之一字、為聖人新意、非也、博古圖載
周仲稱父
鼎銘曰、維王五月初吉丁亥、齊侯鑄鐘銘曰、
惟王五月、辰在戊寅、敎敎銘曰、惟王十月、
又曰、趙伯循曰、天子常以今年冬、班明年正朔於諸
侯、諸侯受之、每月奉月朔甲子、以告於廟、所謂稟正
朔也、故曰王春月、

不書即位

黃澤曰、此隱公之元年、何以不書即位、攝故也、君薨
而世子立、世子幼、則國政聽於大臣、堪事而復辟焉、

古有之矣。曰：隱公為大臣乎？曰：非也。庶長而有先君之命，使之攝而奉桓者也。何以知其有先君之命乎？曰：桓公之母仲子也。以貴聘之，則其子貴矣。故桓公之生，先君既以為世子，諸侯國人知之矣。則隱公之攝，非先君之命而誰乎？曰：庶長何以不得立？曰：是聖王之制，所以正嗣統而杜禍亂之原，定民志也。禮諸侯一娶九女，無再娶之文。適夫人無子，則擇諸右媵；右媵無子，則擇諸左媵；左媵無子，而後取諸衆妾之子，亦皆以其序焉。有常制矣。隱母媵也，故其子不得承統。然則桓母適乎？曰：不適。曰：不適則曷為而貴？曰：

非違非媵桓母也。非違非媵是謂再娶。蓋先君之失禮而臣子末如之何者也。惠公之適妃孟子也。孟子卒。繼室以聲子。隱母也。其後仲子之歸魯。蓋純以夫人禮聘之。國人皆曰此夫人也。隱亦嘗母事之矣。雖然。豈禮之正哉。是故明天子在上。則婚娶得禮而違庶之分明。及王制不行。而後諸侯越禮者衆。越禮矣而直以古義斷之。則於事情之實將不勝其扞格而終非臣子所得追議於君父也。然則隱烏得而不奉桓乎。穀梁子曰。讓桓不正。若隱者可謂輕千乘之國。蹈道則未。由穀梁之說斷則斷矣。而不違乎事情之情。

昧乎禮之權者也。使隱公黜桓而自立，則是負先君之託，先君之肉未寒，而舉其所愛，推而遠之，設令其禍不至於殺，而桓之母子失所矣。而曰我為正，其得謂之正乎？其得謂之孝乎？而人之情，又肯盡從之否也？使人情而果從，是亦亂耳，是亦篡耳。況人情未必然而先君之命，寔不可改乎？故隱之奉桓，足以為賢，而說春秋者，苟能殺事情，酌時宜，以處中，而毋執一焉，庶幾乎得之矣。

又曰：說春秋，須要推究事情，使之詳盡，然後得失乃見。如澤說桓母仲子，是惠公失禮再娶，乃是推尋始

見得如此。所以確然自信不惑。蓋經書考仲子之宮。初獻六科。若以仲子為遠。則正當祔廟。不應別立宮。若謂母以子貴。則魯十二公。非遠出者尚多。皆未聞為其母別立宮者。別立宮止有仲子。蓋是常以夫人禮娶之故。特異之也。又禮記稱夫人之不命於天子。自魯昭公始。如此則惠公之娶仲子。蓋已請命於周室。如此推尋。則知當來仲子歸魯。是以夫人禮聘之。明矣。此雖失禮。然在魯之臣子。則不當論。

又曰。魯隱公不書即位。穀梁謂之讓桓不正。左氏以為攝而不明。斷其是非。然既謂之攝。是有先君之命。

非諸大夫扳而立之也。應立而讓。則謂之讓。不應立。故謂之攝。桓母素貴。稱夫人故也。

又曰。何休以為隱母是左媵。桓母是右媵。亦不過測度之辭。隱母乃是媵。桓母是失禮再娶耳。既娶而生桓公。未幾而惠公沒。隱公之攝。寔出於先君之命。使之攝而俟桓長。傳稱惠公之薨。有宗師。太子少。是惠公之時。桓公已正太子之位。夫桓公既已正太子之位。則隱公之攝。乃父命明矣。然則隱雖欲不讓。烏得而不讓乎。又宗魯為婚姻。而惠公未葬。宗來伐喪。此何故也。豈非以桓公仲子故邪。夫太子少。而隱公立。

斯固宋人之所疑者。桓公內有國人歸嚮之情。外有宋之援。使隱果不賢。亦未敢遽奪之也。而况隱之志本能讓乎。

又曰。穀梁謂隱公不當讓。此不達禮之變。而亦不知當時事情。儒者生于後世。而追斷古事。徃不合者。不達事情故也。使穀梁生於斯時。則親見當時國人之情。知惠之貴桓。見桓母之存。而國人貴之。隱公母事之。而先君立桓之命。人之所知。隱公讓桓之舉。寔為能遵先君之命。則自不敢如此說矣。若使穀梁生此時。見此事。而左若隱公。使之自立。則自導人為不

義此說一萌。不論事之濟否。而隱公讓桓之美意壞盡矣。故儒者若欲追論古人。必若身親見之。親當之。則自然合事情而無過論也。聖人所以異於人者。蓋雖一切以禮義為斷。然未嘗迂遠而拂事情。公羊傳曰。立適以長不以賢。立子以貴不以長。此三代立子之法。必禮經之言也。

又曰。不書即位。公羊穀梁所見自殊。胡文定是穀梁。而非公羊。其說雖正。然于事情不察。未免有差失。以王制論之。則惠公元妃孟子。既無子。則隱是庶長當立。胡氏以隱是讓而非攝。其說是矣。但禮失之餘。先

君之事亦已如此。既不容探其本而歸之正。而徒裁
正其末流。豈不齟齬扞格。而大拂於人情哉。仲子之
歸魯。蓋以夫人禮聘之。若據此事情。則仲子既貴。桓
是太子。隱自不得立。其所以攝者。父命也。如此。則公
羊之說為是。又據左傳。則元妃既薨。聲子已攝內政。
久之。仲子歸魯。既稱夫人。聲子亦已退避。仲子之貴。
有素矣。隱公二年十二月乙卯。夫人子氏薨。三年四
月辛卯。君氏卒。仲子稱薨。聲子稱卒。舊法如此。聖人
斟酌輕重之意。亦可見焉。或曰。正義不從而固從此
偏曲之說何也。曰。此變禮也。非偏曲也。若欲伸正義。

必明天子而後可。不然則用穀梁之說以輔佐隱公使之自立則上逆天子君父之命。又必殺桓公母子而後可焉。此說春秋者所以不得已則從權也。或曰何以謂之上逆天子。曰惠公在位久。晚年以魯夫人之祥娶仲子。若不請於天子。以夫人禮聘則宗人必不與。雖是失禮。然亦有故。又與汎常違禮者不同。故說春秋者又當斟酌事情。未可直情而徑行也。

又曰莊公元年不書即位。當據公羊傳為正。其言曰公何以不言即位。春秋君弒子不言即位。君弒則子何以不言即位。隱之也。孰隱。子也。何休曰。隱痛是

子之禍不忍言即位、公羊此義當矣、穀梁則曰繼弑
君不言即位、正也、繼弑君不言即位之為正、何也、曰
先君不以其道終、則子不忍即位也、其說雖正、然不
及公羊、蓋據公羊則知是聖人所改、據穀梁則是作
史者皆當如此書、故知公羊之義為得、所以必須似
此推校者、蓋公羊之義正、則胡文定為世子必誓於
王、為諸侯內無所承、上不請命、擅有其國、春秋繼而
不書其說、太矯激、非正矣、夫莊公為太子、蓋已誓于
天子、天子已知其應立、及君薨、則太子嗣位、嗣位而
告喪、告葬、歷三代、蓋已有定例、方其告喪、告葬、天子

使來歸賵。此是舊典。應如此。及周之衰。賵贈錫命之禮。雖有遲速。或至全闕。然嗣子承統。必告天子。當已。在告喪之時。決無不請命。擅有其國之理。又設令世子嗣位告葬。雖未獲天子之命。然如期而葬。名正言順。先君既以禮葬。嗣子名亦已達於天子矣。豈可以為擅有其國乎。惟不書即位。當是夫子所削。蓋桓公以去年十二月葬。則莊公必用踰年改元之禮。夫子以為父死於外。子當隱痛。故不書即位。此公羊之義。所以為得文定之說。失之太過也。

按古者有攝主之禮。上卿及長庶皆可為攝主。後儒

考論不詳幾不聞是名而又見於俗之衰薄一聞所謂攝則以為禍亂之本因王莽居攝篡漢並疑周公必不居攝夫周公為攝主以奉成王正古之禮也黃氏言魯隱公必承父命為攝主以奉桓此在古人原非異事孔子與魯子論君薨而世子生之禮是古者君薨世子未生猶有攝主而無所嫌疑雖然茲事也春秋之末已難行之哀公三年左傳季孫有疾命正常曰無死南孺子之子男也則以告而立之女也則肥也可季孫卒康子即位既葬康子在朝南氏生男正常載以如朝告曰夫子有遺言命其國臣曰南氏

生男則以告於君與大夫而立之。今生矣男也。敢告。遂奔衛。康子請退。公使其劉視之。則或殺之矣。此哀薄之一端。因此推之。康子即位。是世卿之家有攝主也。鄭康成注禮記曾子問篇曰。攝主。卿代君聽國政。不言長庶為攝主者。一避或無長庶。一雖有長庶。或君不命為攝主。然則隱公之攝為有父命。黃氏之說確矣。既有父命。則惠公之薨。告喪於天子。必亦如嗣子承統之禮。而以父命為攝主。告于天子。此禮之常也。而胡氏曰。內不承國於先君。上不稟于天子。二語皆無著。趙訪春秋屬辭。以爲行即位之禮。則書即位。

不行即位之禮則不書即位。隱公為攝主奉桓不行即位之禮也。繼弑不忍即位亦不行即位之禮也。夫莊公閔公僖公以為不忍而不行即位之禮則是繼弑不行即位之禮為一定之典禮。公何不用是典以明己之不忍不與乎弑哉。蓋弑君大變也。典禮所無。繼弑君不書即位亦史法所無。春秋一裁以天理天理所不忍言者莫如繼弑而曰即位也。故推原臣子之情不書即位。蓋雖告廟臨群臣而當是際必有深痛難安者不必書於策也。舊史或書之。夫子必削之以見此理。桓則與聞乎弑故仍舊史所書以不忍者形之而

惡其忍。宣視桓有間。然為弑君者所立而受國。不討賊。何有於不忍乎。桓宣書即位。理在此也。隱公受父命。直君臨國。待桓長。然後退而與桓。與上卿之為攝主。又不同。此雖惠公之失。然隱自以為攝。改葬惠公。亦不臨。蓋奉桓為先公之世子。而不自成為君。是其所以不書即位也。仲子之娶。以夫人之禮。桓公之生。以世子之禮。黃氏論之詳矣。

諸侯立子之制

何休曰。禮遣夫人無子。立右媵。右媵無子。立左媵。左媵無子。立嫡姪娣。嫡姪娣無子。立右媵姪娣。右媵姪

娣無子立左媵姪娣

黃澤曰成公九年二月伯姬歸於宋經書衛人來媵又書晉人來媵又書齊人來媵按左傳凡諸侯嫁女同姓媵之異姓則否今魯嫁伯姬三國來媵共十二女而齊是異姓豈宗先代之後上公爵尊故如此與然不可攷矣又按傳隱公三年云衛莊公娶于齊東宮得臣之妹曰莊姜美而無子又娶于陳曰厲嬀生孝伯早死其娣戴嬀生桓公莊姜以為己子據厲嬀即何氏所謂右媵其娣戴嬀即右媵之娣又據昭公八年陳哀元妃鄭姬生悼太子偃師二妃生公子留下妃生公子騰此謂

三妃。即夫人與左、右媵。合此數處觀之，則諸侯九女之制甚明。其立子則各從其母之貴賤也。

又曰：齊桓公之夫人三，王姬、徐嬴、蔡姬，皆無子。齊侯好內，多內寵。內嬖如夫人者六人：長衛姬生武孟，少衛姬生惠公，鄭姬生孝公，宋姬生懿公，葛嬴生昭公，宋華子生公子雍。按桓公夫人三，當是徐嬴、蔡姬娶在先，王姬娶在後，所以如此。不是兩媵，故皆稱夫人。內寵六人，寵皆相軋，又非嫡姪，所以子皆爭立，妻妾踰制，非正家之道。

又曰：晉襄公卒，晉人以難故，欲立長君。賈季欲立公

子樂趙宣子欲立公子雍宣子曰辰嬴賤班在九人
其子何振之有杜祁以君故諫偏姑而上之以狄故
諫季隗而已次之故班在四愚按此事宣子如此擬
議後雖不曾成然當時偶無適子而欲立妾子者其
選之擇法大抵如此

又曰惟公子糾不知其母之貴賤小白母衛姬是齊
僖公妾然亦不知其班序之尊卑但據二傳說子糾
母貴宜為君史記謂子糾母魯女則班序不當在衛姬下

君氏

黃澤曰此蓋是省文法猶曰君之母夫人某氏云尔既

不純用夫人禮本難以書而又以君故不可不書是以變其文而書法如此

又曰公羊以尹氏為譏世卿說春秋者往往從其說而深闢左氏之妄澤以為經所書者皆是史有其文非是夫子創書凡史書之法告則書假令果是尹氏則所以得書於魯史者以其來告故也豈有譏刺之意哉夫世卿固當時之弊然其來已久推而上之則堯舜夏禹亦皆然但側微者亦達隱德者必彰不純用世家耳世卿之弊極於周末人情亦皆厭之故有譏世卿之說然春秋治奸名犯分者耳假令果是伊

氏果是周之世卿則書一尹氏之死而乃深寓譏刺之意豈不深險之甚哉

又曰古策書之體甚嚴假令果是尹氏果是天子之世卿便湏考完尹氏名某既是周之卿却為何官與魯有何交故乃因卒而登載於魯之史策既已不知來歷又何以知其為譏世卿或曰尹氏者天子之公卿嘗與先君惠公有盟會故本以名赴而變文書氏以譏之耳曰二百四十二年策書之薨卒惟夫人書氏即無男子書氏之例婦人所以書氏者所以別同姓若魯昭公吳孟子便不可赴同姓之國故婦人以

氏為重其天子之卿大夫既卒若與魯有故而來赴
只應曰某官某卒

又曰夫所謂尹氏者謂天子之大夫書此者所以譏
世卿也而不知當時國史本無尹氏卒之事又世卿
周中世以後之通弊亦非滕臘書之尹氏所能救聖
人褒貶之法豈若是深晦之不明之甚哉

顧炎武曰君氏卒以定公十五年妣氏卒例之從左
氏為是若天子之卿則當舉其名不但言氏也

又曰或疑君氏之名別無所見左傳襄公二十六年
左師見夫人之步馬者問之對曰君夫人氏蓋當時

有此稱然則去其夫人即為君氏矣。戰國齊有
君王后

考仲子之宮初獻六羽

王應麟曰：衆仲對羽數服杜之說不同。服虔云：天子
八，至士二八，則每佾八人。杜預云：天子六十四人，
至士四人，則人數如其佾數。宗大常傳隆以杜注為
非，謂八音克諧然後成樂，故必以八人為列。降殺以
兩，減其二列，爾預以為一列，又減二人，至士止餘四
人，豈復成樂？劉原父謂士無舞，特牲少牢皆士禮，無
用樂舞之儀。關若璩曰：今宗書樂志故必以八人為
列，人誤作八，列誤作制。王氏所見本尚
古。

黃澤曰：妾母立宮，既有定制，則樂舞亦必有定數。何故至仲子始定樂舞？如此推尋，又似前此妾母未嘗立宮，或止是祭於寢，別立宮者，止有仲子所以見其始以貴聘，故其終也特異其禮。與又六佾始書于經，則魯先君之宮皆僭用八佾明矣。及仲子立宮，乃是創見，故疑八佾之舞而問於衆仲。初獻六羽也，以其是特立之宮，故可更議其制。若先君之宮，則相承僭禮已久，不可輕議。是以獨仲子之宮用六佾焉。但妾母祭禮終不可見，據穀梁則當築宮以祭，子祭孫止。然其說太簡略矣。夫築宮一世而遽毀，果合禮意乎？

故竊以為不築宮則已。若築宮則亦當以親盡為斷。

族氏

顧炎武曰：春秋之文，不書族者有二義。無駭卒、挾卒，柔會、宗公、陳侯、蔡叔盟于折，潁會、齊師伐衛，未賜氏也。遂以夫人婦姜至自齊，歸父還自晉，至望，遂奔齊。僑如以夫人婦姜氏至自齊，豹及諸侯之大夫盟於宗。意如至自晉，孺至自晉，一事再見。因上文而略其辭也。公羊宣公元年傳：遂何以不稱公子？一事而再見者，卒名也。注：卒，竟也。竟，但舉名省文。如後人作史，一條之中再見者，不復書姓。左氏不得其解，於潁會齊師伐衛，則曰：疾之，於歸父還自晉，則曰：善之。豈有疾之而去族，善之而又去族者乎？

又曰春秋隱桓之時卿大夫賜氏者尚少故無駭卒而羽父為之請族如挾如柔如溺皆未有氏族者也穀梁傳不爵大夫之說近之而未得其寔莊閔以下則不復見於經其時無不賜氏者矣

又曰劉原父曰諸侯大國三卿皆命於天子次國三卿二卿命於天子小國三卿一卿命於天子大國之卿三命次國之卿再命小國之卿一命其於王朝皆士也韓宣子稱晉士起三命以名氏通再命名之一命略稱人周衰禮廢強弱相并卿大夫之制雖不能盡如古見於經者亦皆當時之寔錄也故隱桓之間其去西

周末久制度頗有存者是以魯有無駭柔狹鄭有宛
奢秦楚多稱人至其晚節無不名氏通矣而邾莒滕
薛之君曰己盆削轉從小國之例稱人而已說者不
知其故因謂曹秦以下悉無大夫彼固不知王者諸
侯之制度班爵云爾

又曰或曰鞏不稱公子何與杜氏曰公子者當時之

寵號宣元年注鞏之稱公子也桓賜之也其終隱之蓋不

稱公子者未賜也劉原父曰公子雖親然天下無生

而通未命為大夫則而青者是以命為大夫也則名氏得

又曰齊公子商人弑其君舍己賜氏也衛州吁弑其

君完未賜氏也。胡氏以為國氏者累及乎上。稱公子者誅及其身。此求其說而不得。故立此論爾。

迎王后

黃澤曰。桓公八年冬。祭公來。遂迎王后于紀。范氏曰。祭公。魯內諸侯。為天子三公者。親迎例時。不親迎例月。故春秋左氏說曰。王者至尊無敵。無親迎之禮。祭公迎王后。未到京師而稱后。知天子不行而禮成也。鄭君釋之曰。大妣之家。在郃之陽。在渭之浹。文王親迎于渭。即天子親迎之明文也。天子雖尊于其后。猶夫婦夫婦判合。禮同一體。所謂無敵。豈施此哉。禮記

哀公問曰冕而親迎不已重乎孔子愀然作色而對曰合二姓之好以繼先聖之後為天地宗廟社稷之主君何謂已重乎此言親迎繼先聖之後為天地宗廟社稷之主非天子則誰乎澤謂范氏說固善然天子親迎之禮終不見明文放古不知如何但所引文王親迎為證則文王之初載其時寔諸侯耳未可據以闢左氏說也記所云繼先聖之後則凡諸侯亦孰非先聖之後乎魯衛晉蔡曹滕出於周之文武宋杞陳為先代之後大抵多是聖人之後也為天地宗廟主者亦據魯祀天而言耳凡此恐未可據以為天子

親迎之禮其後未必行、况當春秋時、魯君往、皆是遣卿、諸侯亦已皆然、當時事體、自應如此、不可責以舊禮、况天子乎、大抵春秋時、數國既多、諸侯守宗廟社稷之重、若一、修親迎之禮、自于事體不便、禮有因人情而變者、故春秋娶女、雖不脩禮、而天子諸侯俱遣重臣、亦禮之變也、又當時天子諸侯、其他廢禮越禮者、何可勝計、若于此責之、是放飯流歎、而問無齒決之謂矣。

踰年即位

顧炎武曰、凡繼立之君、踰年正月、乃書即位、然後成。

之為君未踰年則稱子未踰年又未葬則稱名先君
初沒人子之心不忍亡其父也父前子名故稱名莊
公三十二年子般卒襄公三十一年子野卒是也已
葬則子道畢而君道始矣子而不名文公十八年子
卒僖公二十五年衛子成二十八年陳子公赤定公三
年鄭子公隱是也雜記曰君薨太子號稱子待猶踰年
君也鄭氏注曰謂未踰年也則改元國不可以曠年無君故有不待葬而即位則
已成之為君文公元年春王正月公即位成公元年
春王正月公即位定公元年夏六月戊辰公即位桓
公十三年衛侯公惠宣公十一年陳侯成成公三年宋

公共衛侯定是也。所以敬守而重社稷也。杜氏左傳注衛宣公

未葬惠公稱侯以接鄰國非禮也。蓋不連此義。此皆周公之制。魯史之文。而

夫子遵之者也。公羊傳曰。君存稱世子。世子下仍當

子款鄭世君薨稱子某。既葬稱子。踰年稱公。得之矣。子華之類

又曰。鄭伯突出奔蔡者。已即位之君也。鄭世子忽復

歸於鄭者。已葬未踰年之子也。此臨文之不得不然。

非聖人之抑忽而進突也。杜氏注。賤之者非。忽突皆名。別嫌也。

又曰。未葬而名。亦有不名者。僖公九年。宋子。襄定公

四年。陳子。公懷是也。所以從同也。盟會之文。從周而書。

二年。劉子。單子。以王猛。居于皇。劉。實亦在喪。已葬而不名。亦有名之者。昭

見田學
紀開

公二十二年。王子猛是也。所以示別也。王孺於紀王

又曰。里克殺其君之子奚齊者。未葬居喪之子也。里

克弑其君卓者。踰年已即位之君也。此臨文之不得

不然。穀梁傳曰。其君之子云者。國人不子也。非也。

又曰。即位之禮。必於踰年之正月即位。然後國人稱

之曰君。春秋之時。有先君已葬。不待踰年而先即位

者矣。宣公十年。齊侯使國佐來聘。公頃成公四年。鄭伯

伐許。悼公稱爵者從其國之告。亦以著其無父之罪。

紀侯大

王應麟閻若璩曰。紀侯大去其國。陳齊之謂聖人。蓋生名之。

太名也。若漢藥大是也。愚按以大為紀侯之名。本劉質夫說。

星隕如雨

顧炎武曰：星隕如雨言多也。

陳氏曰：奔流者漢書五

行志。成帝永始二年二月癸未夜過中。星隕如雨。長

一二丈。釋：未至地滅。至雞鳴止。谷永對言春秋記

異。星隕最大。自魯莊以來至今再見。此為得之。而後

代之史或曰：小星流百枚以上四面行。或曰：星流如

織。或曰：四方星流。大小縱橫百餘。皆其類也。余於甲申

丙申望見明食既星流竟夕始悟古時有此異。不言石隕。不至地也。年間六月

子糾

黃澤曰、齊人取子糾殺之、穀梁以為干秉之國而不
能存子糾、范甯序謂穀梁以不納子糾為內惡、是仇
讎可得而容、又注引何休曰、三年溺會齊師伐衛、故
貶而名之、四年公及齊人狩于郕、故卑之曰人、今親
納讎子、反惡其晚、恩義相違、莫此之甚、鄭君釋之曰、
於讎不復、則怨不釋、而魯釋怨、屢會仇讎、一貶其臣、
一卑其君、亦足以責魯臣子、其餘則同不復讎也、至
於伐齊納糾、讎當納而不納耳、此自正義、不相反也、
甯謂讎者無時而可與通、縱納之遲晚、又不能全保

讎子何足以惡內乎。然則乾時之戰，不諱敗齊人，取子糾殺之，皆不迂其文，正書其事，內之大惡，不待貶絕，居然顯矣。二十四年，公如齊親迎，亦其類也。惡內之言，傳或失之，澤謂鄭君之說，雖或未脩，然大抵却是委曲推究，與近世說春秋者不同。范氏讎無時而可與通之說，雖若正大，然不察事之情寔而失之執滯也。若果不可通，則此後桓公伯諸侯四十餘年，率諸侯以尊王，魯亦常在其中，却如何說？夫鳥獸行殺，桓公者齊襄也。齊襄之罪，王法所當誅，王室既不能誅，魯力又不足復讎，而襄公已為國人所弑，則魯人

如何欲遽怒餘人乎。子糾桓公乃僖公之子。襄公之弟。聖人蓋恕魯力之不能復讎而深責其不當與讎通故已。屢書而致其意矣。及讎人貫盈而自罹於禍。國內無主。魯若於此時奉糾而立之。誅其凶亂。則亦庶幾可以雪恥。此實無害於義。惟莊公之意亦豈不欲如此。然第失事機。故非但無益而更取敗耳。若如此看。則春秋始可通而無執滯矣。

又曰。桓公子糾之事。按程子之說。以子糾桓公為襄公二子。據左傳則云。齊桓衛姬之子。有寵於僖。則齊桓乃僖之子。襄公之弟也。又按程子以桓公為兄子。

糾為弟。據公穀及三傳之注，則子糾是兄，桓公是弟。又荀子言桓公內行，則殺兄而爭國，則子糾乃桓公之兄也。又據古者諸侯一娶九女，適夫人無子，則立右媵之子，右媵無子，則擇諸左媵，左媵無子，則取於夫人娣姪。夫人娣姪無子，則取於右媵娣姪。右媵娣姪無子，則取於左媵娣姪。故凡立子，皆是隨其母之貴賤。今桓公之母與子糾之母，其班序高下，無得而考，則桓公子糾之孰為應立，皆不可知，故其是非不可懸斷。但公羊穀梁去古未遠，皆謂子糾應立，所以不直桓公，至謂之篡，又謂經書齊人取子糾殺之，是

自殺其應立之子。又桓公既得國而猶欲殺子糾者，蓋有應立之道，是其所忌。若當時桓公果是兄，子糾果是弟，桓母班序又高，則可用伊川之說，子路子貢亦可以無疑。今二子皆以此為問者，是當時公論不直桓公，皆謂子糾應立。桓公不當殺兄。然夫子皆不答，所謂問乃直取管仲之功，此則正是聖人妙處，不可窺測者也。然夫子不責管仲以死者，蓋公子無為君之逆，師傳先君所誅，不可純以臣禮律之。有患難則相與周旋，既已宣力效勞，竭盡其節，而偶脫虎口，若則亦在所可恕。如管仲是也。若桓公子糾事，須按春

秋經文為正。不按經文，則不見聖人之妙。

又曰：及齊師戰于乾時，我師敗績。胡先生曰：能與讎戰，敗亦榮，以敗為榮，似非正義。又王師尚不諱敗績，魯諸侯也，敗績亦安得不書？又公敗齊師于長勺云：齊師伐魯，經不書伐，責魯也。詐戰曰敗，善為國者不師，善師者不陳，善陳者不戰。至於善陳，德已衰矣，而況兵刃相接，又以詐謀取勝乎？故書魯為主，以責之。澤謂桓公死於齊，莊公不能復讎，及讎人貫盈而死於狄，國內無主，而僖公之子糾逃難於魯，納之，又不能集事，乾時之敗狼狽而歸，鮑叔牙帥師來膂殺。

子糾請取管仲。當是之時，魯幾於不能國矣。公若不
敗齊師于長勺，敗宋師于乘邱，又敗宋師于郕，則亦
何以立國？君子於此，當恕人之情，抑強扶弱，豈得更
復責魯，故知立論不可失之太過。

荆吳

顧炎武曰：楚之見於經也，始於莊之十四年，曰荆而
已。二十三年，於其來聘而人之。二十八年，復稱荆而
不與其人也。僖之元年，始稱楚人。四年，盟於召陵，始
有大夫。公羊傳：謂文公九年，使叔來聘，始有大夫二
疏矣。又謂夷狄不氏，非也。屈完固已書氏。二十
十一年，會於孟。始書楚子，然使宜申來獻捷者，楚子

也。一、二十而不書君圍宋者，子玉。二十救衛者，子玉。戰

城濮者，子玉也。二十而不書帥吳之見於經也。始於

成之七年，曰吳而已。襄之五年，會于戚，於其來聽諸

侯之好而人之十年，十四年復稱吳，殊會而不與其

人也。二十五年，門于巢卒，始書吳子。吳本伯爵春秋以其僭王降從

四裔之外而書子，二十九年使札來聘，始有大夫。然滅州來

昭公十戰長岸。十七敗雞父。二十滅巢。二十滅徐。十三

三年伐越。二十入郢。定公敗檇李。十四伐陳。哀公會相

上會鄆。七年伐我。八年伐齊。十年十救陳。十年戰艾陵。十一

會橐皋。十二年並稱吳而不與其人。會黃池。十三年書晉

侯及吳子而殊其會

哀姜

黃澤曰夫人氏之喪至自齊杜氏曰不稱姜闕文此杜氏之失也不稱姜省文從可知耳又傳曰君子以齊人之殺哀姜為己甚矣此語亦失之哀姜以淫亂致慶父之禍兩君遭弑國幾于亡魯不能容出孫于邾安可聽其稔惡不討乎般及閔公皆其子無討母之理然則權其宜當屬之齊故齊人殺哀姜不為過凡左氏之失類此又曰僖公八年秋七月禘于太廟用致夫人左傳曰禘而致哀姜焉非禮也凡夫人不薨于寢不殯于廟

不赴于同、不祔于姑、則弗致也。公羊傳曰：「譏以妾為妻，殺梁傳曰：「立妾之辭。」三傳所說不同，當以左傳為是。二傳揣度，不足據也。按左氏：哀姜私于共仲，共仲因此遂欲自立，及共仲弑閔公，故哀姜孫于邾。齊人殺之，而以其尸歸，故僖公立而請其尸於齊以葬。此皆事之情寔，見于經傳者，具有血脉。但夫人雖得以禮葬，然於禮典不應入廟與享。及八年禘祭，遂以夫人與享于廟，因致之於莊宮。左氏譏其非禮者，為其不當致而致，違周公之禮也。夫：人之斃，焉有不在寢者？不在寢，非姦則亂，故絕之，使不得配先君與祭享。此

聖人所以正家禮禮垂訓于後而僖公以區、之仁
違禮犯義厚則厚矣其如先君之禮法何此事本末
甚完不可更從他說

顧炎武曰禘于太廟用致夫人夫人者哀姜也哀姜
之薨七年矣魯人有疑焉故不祔於姑至是因禘而
致之不稱姜氏承元年夫人姜氏薨於夷之文也哀
姜與弑二君而猶以之配莊公是亂於禮矣明乎郊
社之禮禘嘗之義治國其如示諸掌乎致夫人也躋
僖公也皆魯道之衰而夫子所以傷之者也胡氏以
夫人為成風成風尚存何以言致亦言之不順也

晉侯夷吾卒

顧炎武曰。僖公二十四年冬。晉侯夷吾卒。杜氏注。文公定位而後告。夫不告文公之入。傳曰。秦伯納之。而不書。不告入也。而告惠公之薨。以上年之事為今年之事。新君入國之目。反為舊君。即世之年。非人情也。疑此經乃錯簡。當在二十三年之冬。傳曰。九月。晉惠公卒。晉之九月。周之冬也。蓋懷公遣人來告。

趙盾

黃澤曰。凡史官書法與刑官論刑。大體固不異。如趙盾之事。以法言之。則穿為元惡。盾若不知情。當只坐

中途聞難而復不討賊為罪然此罪亦已應誅蓋元惡若與盾非族黨盾亦不能逃匿庇凶逆之罪其迹亦當與知情同今穿既是盾之族黨盾若誅穿尚難以自明况庇而不誅則盾與穿同惡同罪矣以位言之則盾為執政之卿以族屬言之則盾為從父是固不可得而未減者若以董狐書法言之則為國正卿止不出境反不討賊不論知情與否皆同弑君書穿則盾之罪不明書盾則與穿同論史法與論刑其實亦不大相遠也

又曰左傳趙盾事首尾皆寔惟越竟乃免語意不脩

故學者多疑之。若曰：越竟討賊，乃免，則語意脩矣。

按：越竟討賊，語亦未當。蓋越竟不逐，乃可免；逐則不惟討賊而已。既討賊，猶當束身以待誅。雖後君赦之，亦為罪人，以終身不復與聞國事，不與士大夫接可也。

葬用柔日

顧炎武曰：春秋葬皆用柔日。宣公八年冬十月己丑，葬我小君敬嬴。雨不克葬。庚寅，日中而克葬。定公十五年九月丁巳，葬我小君定姒。雨不克葬。戊午，日下

是乃克葬已丑丁巳所卜之日也。遲而至於明日者，
事之經也。非用剛日也。經文所書葬列國之君無非
柔日者惟成公十五年秋八
月庚辰葬宋共公是剛日其亦漢人不知此義而長
兩不克葬遷而至于明日者與
陵高以丙寅茂陵武帝以甲申平陵帝昭以壬申渭陵帝元
以丙戌義陵帝哀以壬寅皆用剛日。

比月書日食

王應麟曰：春秋日食三十六，有甲乙者三十四。歷家
推驗精者，不過二十六。有日朔者二十六，以周歷考
之朔日失二十五，魯歷校之
又失唐一行得二十七。朔差本朝衛朴得三十五，獨
莊十八年三月，古今算不入食法。

又曰、漢日食五十三、後漢七十二、唐九十三、歷法一百七十三日有餘一交會、然春秋隱元年至哀二十七年、凡三千一百五十四月、惟三十七食、是雖交而不食也、哀二十一年九月十月、二十四年七月八月頻食、是頻交而食也、漢帝高三年十月十一月亦頻食

閻若璩曰、按此月頻食、此理所絕無者、歷家如姜岌一行皆言之鑿、余嘗意襄公二十一年二十四年之前之後、必有其公某年為冬十月庚辰朔日有食之者、又有為八月癸巳朔日有食之者、脫其簡於彼而錯其簡於此、事固有之、理或一解、秦雲九頗以為

然

又曰按春秋三十六日食有誤五為三者莊公十八年僖公十二年是有誤三為二者文公元年是有誤十為七者宣公八年是有誤九為六者昭公十七年是有以後月作前月不應閏而閏先時者隱公三年桓公三年十七年莊公二十五年三十年是有以前月作後月應閏而不閏後時者宣公十七年成公十七年襄公十五年二十七年昭公十五年定公十二年至僖公十五年五月之交宜在四月然乃亥時月食非日食何誤至此蓋史失其官閏餘爭次從古

未有過於春秋之世。則難信。亦未有過春秋之書者也。衛朴以莊公十八年三月獨不入食法。不知法推是歲五月壬子朔申時日食。元史郭守敬曰。蓋誤五為三是也。

按日食後越五月六月皆可再食。無比月頻食之理。春秋比月而食者。再以推步之法考之。襄二十一年九月朔入日食限。十月朔不入食限。二十四年七月朔入日食限。八月朔不入食限。說者或援漢高帝及文帝時兩頻食。證古或有之。以推步上考。高帝三年十一月甲戌合朔入食限。十二月癸卯合朔不入食

限而漢志誤以甲戌為十月晦癸卯為十一月晦漢人歷法之疎如是又考文帝三年十一月丁酉合朔入食限十二月丁卯合朔不入食限漢志亦如前此非空言說經所可知也

妣氏卒

顧炎武曰定公十五年妣氏卒不書薨不稱夫人葬不稱小君蓋春秋自成風以下雖以妾母為夫人然必即位而後稱之此妣氏之不稱者本無其事也左氏謂不成後世之君多於柩前即位於是大行未葬而喪者非尊其母為皇太后後漢儀禮志三公奏尚書顧命太子即日即天子位於柩前請太子

即皇帝位皇后為皇太后奏及手所生亦以例加之
可群臣皆出吉服入會如儀
妾貳於君子疑於父而先王之禮亡矣

大夫稱子

顧炎武曰周制公侯伯子男為五等之爵而大夫雖
貴不敢稱子春秋自僖公以前大夫並以伯仲叔季
為稱詩云伯兮叔兮此大夫之稱也春秋僖公十五年
震夷伯之廟杜氏注夷指伯字大夫既卒書
字三桓之先曰共仲曰僖叔曰成季孟孫氏之稱子
也自蔑也文公十年叔孫氏之稱子也自豹也
孫氏之稱子也自行父也
文公十三年閏公元年書
季子二年書高子皆春秋
之特晉之諸卿在文公以前無稱子者魏氏之稱子

也。自儻也。僖公二年樂氏之稱子也。自枝也。僖公二年趙氏
之稱子也。自衰也。文公二年中行伯之稱子也。自林父也。文公十年郤
氏之稱子也。自缺也。文公十年知氏之稱子也。自首也。宣公二
年范氏之稱子也。自會也。宣公十年韓氏之稱子也。自厥
也。宣公十年晉齊魯衛之執政稱子。他國惟鄭間一有之。餘
則否。不敢與大國並也。魯之三家稱子。他如臧氏。子
服氏。叔仲氏。皆以伯叔稱焉。不敢與三家並也。惟襄
公十年有子叔齊子。其生也。或以伯仲稱之。如趙孟知
伯。死則謚之。而後子之。猶國君之死而謚稱公也。於
此可以見世之升降焉。

又曰春秋時大夫雖僭稱子而不敢稱於其君之前

猶之諸侯僭稱公而不敢稱於天子之前也何以知

之以衛孔悝之鼎銘知之曰獻公乃命成叔纂乃祖

服曰乃考文叔興舊耆欲成叔孔成子烝鉏也文叔

孔文子圉也叔而不子是君前不敢子也左傳韓厥言于晉侯

亦云成猶有先王之制存焉陸渾曰侯伯子男之位

季宣孟孫亦曰公子而謚不得云公者謚是王所賜也大夫

之臣得稱其子主曰子而謚不得稱子者謚是君所

賜至戰國則子又不足言而封之為君矣洛誥予旦

以多子越御事多子猶春秋傳之言羣子也宣公十二年
唐孔氏以為大夫皆稱子非也

論語

漢書藝文志論語古二十一篇

出孔子壁中兩子張

子張問何如可以從政

齊二十二篇

多問王知道如

已下為篇名曰從政

桓譚曰古論語二十一卷文異者四百餘字

何晏曰漢中壘校尉劉向言魯論語二十篇皆孔子

弟子記善言也太子太傅夏侯勝前將軍蕭望之

丞相韋賢及子玄成等傳之齊論語二十二篇其二

十篇中章句頗多於魯論琅邪王卿及膠東庸生昌

邑中尉王吉皆以教授故有魯論有齊論魯共王時

嘗欲以孔子宅為宮，壞得古文論語。齊論有問王知
道，多於魯論二篇。古論亦無此二篇。分堯曰十章，子
張問以_下為一篇，有兩子張。凡二十一篇。次不與齊
魯論同。安昌侯張禹本受魯論，兼講齊說，善者從之。
號曰張侯論，為世所貴。包氏周氏章句出焉。古論唯
博士孔安國為之訓解，而世不傳。至順帝時，南郡太
守馬融亦為之訓說。漢末大司農鄭玄就魯論篇章
考之齊古，為之注。近故司空陳羣、太常王肅、博士周
生烈皆為義說。

隋書經籍志：張禹本授魯論，晚講齊論，後遂合而改。

之。則其煩或除去齊論問王知道二篇。從魯論二十篇為定。

王應麟曰。陸氏釋文於申枨注曰。申枨。包云。魯人也。鄭云。蓋孔子弟子申績。史記曰。申黨。字周。家語云。申績。字周也。今史記以黨為黨。家語以績為績。傳寫之訛也。後漢王政碑云。有羔羊之潔。無申黨之欲。亦以枨為黨。則申黨。申枨一人爾。唐開元封申黨。召陵伯。又封申枨。魯伯。本朝祥符封枨文登侯。又封黨淄川侯。俱列從祀。黨即黨也。一人而為二人。失於詳攷。論語釋文也。

馬端臨曰。齊論多於魯論二篇。曰問王知道。史稱為張禹所刪。以此遂無傳。且夫子之言。禹何人而敢刪之。然古論語與古文尚書同。自孔壁出者。章句與魯論不異。惟分竟曰。子張問以下為一篇。共二十一篇。則問王知道二篇。亦孔壁中所無。度必後儒依倣而作。非聖經之本真。此所以不傳。非禹所能刪也。

朱彝尊曰。按漢志論語十二家。齊二十二篇。多問王知道。如淳曰。問王知道皆篇名。說者謂是內聖外王之業。此傳會也。論語二十篇。皆就首章字義名篇。非有包括全篇之義。今逸論語見於說文。初學記。文選。

注太平御覽等書其詮王之屬特詳竊疑齊論所逸
二篇其一乃問玉非問王也考之篆法三畫正均者
為玉中畫近上者為玉初無大異因譌玉為王耳王
伯厚亦云問王疑即問玉

孟子

漢文藝文志孟子十一篇

名軻鄒人子思弟子有列傳師古曰聖證論云軻字

子車而此志無字未詳其所傳

應劭曰孟子作書中外十一篇

趙岐曰外書四篇性善辨文說孝經為正其文不能
弘深不與內篇相似、非孟子本真後世依放而述

之者也。

爾雅

漢書藝文志爾雅三卷二十篇。

張晏曰爾近也雅正也。

楊雄曰孔子門徒游夏之儔所記以解釋六藝者也。陳傅良曰古者重小學漢嘗置博士如毛氏詩訓許氏說文楊氏方言之類皆有所本隋唐以來以科目取士此書浸廢韓退之尚以注蟲魚為不切則知誦習者寡矣。

王應麟曰爾雅西至於邠國謂之四極朱文公曰邠國近在秦隴非絕遠之地按說文引爾雅曰西至汭

切府中國謂四極。八西極之水也。

又曰白虎通引親屬記。即爾雅釋親也。

按釋詁最古。釋言釋訓似後人附益。然皆不足深據。如台朕。齊果卜陽予也。台朕陽為予。我之予。齊果卜為賜予之予。孔。魄哉延。虛無之言間也。郭注。孔穴延。魄虛無。皆有間隙。餘未詳說文哉言之間也。言之間。即語助辭。然則哉之言三字。乃言之間。豫射厭也。豫為厭足飽飫之厭。射為厭倦厭憎之厭。此皆概拾之。病其他解釋詩書。緣辭生訓。非字義之本然者。不一而足。然與所見傳注。莫先毛詩。其書又在爾雅後。爾

雅杜甘棠。梨山檟榆白粉等句。請微異杜。澁棠甘而
名可互訓。杜赤棠白者棠。以棠見杜。甘棠以杜見
棠。杜甘曰棠。梨山生曰檟榆白曰粉。毛詩傳甘棠杜
也。誤粉白榆也不誤。朱子集傳曰粉白榆也。本毛詩
又曰榆白粉也。誤讀雅。其他毛氏誤用爾雅者尚多。
可證爾雅非襲今所得見之傳注。若說文視爾雅毛
詩固最後。沿本處多。要亦各有師承。爾雅以衣涉水
為厲。繇帶以上為厲。說文砥履石渡水也。引詩深則
砥。亦作瀦。詩又以淇梁淇厲淇測並稱厲者。不成梁
之名。此字說文得其傳。爾雅乃失其傳。逐字推求。遽

數之不能終其物用。此見漢人之書。就一書中有師
承。可據者。亦有失傳。傳會者。在好學之士。善辨別其
間而已。

是書從河間紀先生處借錄。惟惟此邵二雲
手校一過。無甚謬錯矣。乾隆己丑九月十八日。在
都季父廩記于京城師坊橋北百順棚鄉寓舍。